

## Jaorverslag Carnavalsvereniging 'De Spurriemok' Seizoen 2006 – 2007

Ut seizoen 2006-2007 gut de geschiedenis ien as ut seizoen van Prins Rob en Prinses Linda, Jeugdprins Giel, Jeugdvorst Niek, Jeugdnar Maarten, chi-chi-wa, afscheid van osse vurzitter. Teaves gut ut de geschiedenis ien as wederom un fantastisch seizoen.

Ut bestuur bestond uut:

- vurzitter Wout Zanders
- vorst Erik Flinsenbergh
- penningmeester Hans Loonen
- waarnemend sik Ruud Zanders
- bestuursleje: Ron Sanders, Jacquo Gerritse en Rob Pluk

En kwaam 7 kier bej-en op verschillende platse.

De raod van elluf bestond uut:

Erwin Steeghs, Stef Claessens, Johan Craenmehr, Emiel Evers, Jan Classens, Roel de Rijck, Fabian Voermans, Dave Clephas, Frank Pluim, Jop (mit en p) Loone en Marc Zanders.

En kwaam 7 kier bej-en ien de garage bej Wout en Lilian. De allerleaste kier daar ien de garage en dan gaon we

Net as alle andere jaore begos ut seizoen wer op dun ellufde van dun ellufde. Dit kier vur ut urst sinds jaore is nie mit de jaorvergadering. Nea, nea, dit jaor haj 'de Spurriemok' groet nejs. D'n Terp liep dan ok op zich wel moj vol en um 11 ovver 11 naam Vorst Erik ut woord um dit wer snel dur te geave an vurzitter Wout, den ut groete nejs moog vertelle. Ut programma wert vanaf volgende seizoen op de kop gezet. Hoe en wat is uutgelet en doe ik hier nie mer. De rest van de aovund verliep rustig, mar gezellig. Ut kan un moj traditie werre um gewoen dun ellufde van dun ellufde ien de kroeg te beginne.

De zaoterdag daarop, 18-11, was ut vorsteraodsbal. Dit kier georganiseerd dur ut Veule. De vorste mosse allemaol op unne rodeostier hun verhaal doen en ok nog zurrege dat ze nie van den stier afviele. Osse Vorst Erik kwaam goed vur dun dag en haj alvast un vurbeeld van de urste Rooyse Prinses van 2015 mitgenome.

Erik, os complimente vur ow verhaal en wej zien blie dat geij ok buute Oeldere os vereniging moj wet ner te zette.

An ut begin van ut seizoen het de carnavalsvereniging ok un nej e-mailadres geopend: [spurriemok@live.nl](mailto:spurriemok@live.nl). Ut was de bedoeling um van hieruut dur enne Spurriemök regelmatig naor veul Oelderse minse un bericht te sture. Dur en technische storing is dat nie gans gelukt. Volgend seizoen zal wel en nej poging werre gedaon.

Vrejdag 24-11 en zaoterdag 25-11 ware de bonte aovunde. Zoe-as gewoenluk op vrejdag ruum 150 minse en op zaoterdag hartstikke uutverkocht.

3 neje raodslaje werre vurgesteld ....

- Erwin Steeghs, den nie op zien vader liekt umdat hej nao enne goeje carnavalsaovund wel nog en zinnig woord uut kan brenge
- Job Loone, den wel op zien vader liekt umdat hej ok niet van tuiniere halt

- Stef Claesses, den net duut of hej de mojste vriendin het, mar wat nie klopte volgens Ron Sanders, allien mog Liset dat wer nie wiete.

De bonte avond begos, ondertusse al host traditioneel, met de Oelderse dansgroep. Zej danse dur wer lustig op los. Zej dun al vur dun ? kier mit. Dun dans is misschien nie beater as ien ut begin, mar ut oeg het wel zeker mier.

Daornao kwaam dun buut van ?. Hej vond dat dur niks mer duudeluk was. Zette de minse unne Ooievaar ien dun tuin mit een bord daoronder 'merel'.

Vervolgens kwaam is enne kier nie de APK, mar de vrollie van de APK. De kels ien ut verleje oefende weake an ien stuk, mar dees vrollie han hun stukske zoe onder de kneej. Zej danste dur vroluk op los.

Tot slot vur de pauze kwaame Emiel en Ton op de buhn. Dees twie staon ondertusse ok vort garant vur 20 minute lol. Zej praote mit name ovver de cliché's, ovver de politiek en tot slot begosse ze ok nog te zinge ... hoe gek kan ut werre?

Op zaoterdag wiere vur de pauze Thej en Truus nog bedankt vur 15 jaor fijne samenwerking tusse hun en 'de spurriemok' ien de Linde. Zej kregen un tap cadeau, vakkundig ien elkaar geflatst dur Ron.

Onder de pauze mos dur wer geld verdiend werre en dus wiere dur brudjes verkocht tigde betaling van slechts 1 munt. Toen iederien nog an ut naogeniete was van zien brudjes, begos ut programma alwer.

Ok nou begosse we wer mit enne dans. Dit kier gen oelderse vrollie, mar casselse. En ondanks dat gegeave, sloeg ut toch goed an. Ok ien os buurdurrep kunne ze dur dus wat van.

Hiernao kwaam Zalver, kwak Zalver, de buhn op. Hej praote as enne kwakzalver, hej zaag dur uut as enne kwakzalver. Vuulde ow enne kier nie goed, dan gaode mar naor den kwakzalver (???)

Hiernao stond dur enne buukspreker op de buhn. Hej haj uiteraard en pop bej zich en same vertelde zej zonne hoep wazel. Dit ware Peter as buukspreker en Merrit as pop.

Tot slot kwaam plusminus de buhn op. Ut is zoe as Vorst Erik ut zej: 'noem hun mar gerust plusplus'. Nie um andere teniet te doen, mar zonne afsluuter han we al jaore nie mer gehad. Zej zette dan ok de zaal echt op de kop.

Hiernao volgde nog de finale. Iederien den bedankt mos werre, wier bedankt en alle artieste kwaame nog un kier de buhn op. Net as de tonielmeesters en de organisatie. Hiernao wier dur nog veul naogepraot en bleef ut gezellig tot ien de late uurtjes.

Op 10 december zien dur un antal roadsleje mit Prins Piet, Vorst Erik en de CV van Leune naor Berge gewist, waor un Prinsetreffe was mit veul bekende artieste. Ron Sanders zaag zich latter zelluf terug op de Limburgse zender en meant nou vort dat hej enne bekende Limburger is.

Ien december wier hiel Oeldere goed ien de gate gehalde dur enne echte satelliet, enwel 'de Spurriemoksatelliet'. Alles wat mar iets mit de CV te make haj, wier ien de gate gehalde, van jong tot ald en van klen tot groet.

31 december was wer ut Prins roaje. Dur wier veul geraoid, enne hoep nie goed en ok enne hoep wel goed. Mar dat kosse we pas en weak latter zien.

7 jannewari de prinseproclamatie. We begosse wer ien den Terp mit ut aftreje van Prins Piet en Prinses Ella. Nog iene kier terugblikke dur Lange Hans en baas E, nog iene kier enne speech van Piet, en zellufs nou ok van Ella, nog iene kier dun kregemars en toen was ut echt gedaon.

Vurdat we wegginge uut den Terp liet Vorst Erik nog gauw efkes dun grutste droem van Johan Verdeuzeldonk en zien Trudy uitkomme. Moj gedaon en ge zaagt inderdaad veul minse denke: 'Johan, droem mar lekker verder!'

Toen mit zien alle naor de Linde. Daor stond en groet krentje op ut podium. Dit krentje stond wer gans vol en dit kier mit allehande anwizinge aover de neje Prins. De spanning wier opgevoerd en Vorst Erik was toe an de leaste 11 regels. Hej zette veul minse op ut verkierde bien en daor kwame tusse de ballonne dur: Prins Rob dun Urste en zien Prinses Linda.

Vervolgus was ut de beurt an de jeugd. Vorst Erik mos enne verrekes moeilijke puzzel oplosse. Dit deuj hej same met ut kersverse Prinsepaar, alhoewel dat de snelheid van oplosse echt nie bevorderde. Toen alle kiender ginge hellepe, begos ut urges op te lieke. De oplossing was ut woord 'umdreje'. Erik dreje alles um wat hej mar kos, mar ut bleek dat iederien zich um mos dreje. Daor zakte de spurriemoksatteliet naor beneje mit daorien: jeugdprins Giel dun twedde, jeugdvorst Niek en jeugdinar Maarten.

Toen was ut de beurt an de boerebrulluftcie, en neje cie mit veul carnavalsgekke van buute de raod. Dees commissie het alles m.b.t. de boerebrulluft geregeld op en complimentwaardige manier. Bej dizze dus. Ut uitkomme ging onder ut motte 'boerin zoekt man. 3 gemaskerde kels mosse vraoge beantwoorde en de winnaar van dees vraoge wier ontmaskerd. En daor stond Rob Steeghs. Dit mot durgestoke kaart zien gewist, anders kan Rob toch nie winne? Hej onthulde zien bruid: Trudy Verdeuzeldonk. Dit alles ging Johan te wiet en hej eiste de bruid op en toen was ut bb echt bekend: Johan en Trudy Verdeuzeldonk.

Zoe, de vurgangers zien wer bekend en laot nou de bals mar komme!

Op 17 jannewari was wer de JVV-aovund. De opkomst viel tege, mar de gezelligheid was dur wer. Ut prinsepaar mit hun gevolg kwaam ien polonaise binne. Prins Rob stelde zich urst an alle nejsgerige aldere vur. Ok zien Prinses stelde hej vur: zej kumt van oorsprong uut Cassele, mar daor kos ze zelluf ok niks an doen.

Toen kwaam dur en kleurwedstrijd vur bejaarde. Ien 3 minute ut blad vol kratse. Dit kos Jan Zanders ut beste en hej is dan tiggeworrige ok vort de opperkleurder van de bejaarde. Natuurluk was de volksdansgroep dur ok wer. Ondertusse kwaam dun misteriegast binne. Ut duurde lang veurdat hej geraoje wier. Uuteindeluk kwaam te vurschien: Driek Smits. Wie: Driek Smits. Enne ald Oelderse, nou woonachtig ien Rooj. Vervolgus kwaam jaerke vertelle aover zien ski-vakantie. Dit was Pierre van Helden uut de melderse. Loone Thei moog ok nog en mopke vertelle en tot slot kreges Jan Joeste, Ger toebast en Lowie Voermans nog en onderscheiding en dun aovund zaat dur al wer.

Al mit al enne moje aovund mit minder minse as andere jaore, mar wel enne huggere umzet. Dat zet toch genoeg!

Ut fiest der fieste, 20 jannewari, oftewel ut Ald Wieverbal. Moj, druk, gezellig, ut kos niet beater, complimente, bier, muziek, polonaise, de mok is los, gladde vloer, bier, kaoje, en nog gladdere vloer, bier, en knalfiest, bier, afgeloepe, eier eate, knalfiest ien dun kop 's mergus vroeg.

Oftewel: dit was echt ut fiest der fieste. En kej goeje band: de Towerband die werkeluk dun ganze zaal op zien kop zette en iederien duj dan ok mit.

De groepe han dur wer veul werruk van gemakt. En umdat de CV te zeikerig is um ut Ald wief werkeluk af te geave, wonne dit jaor Erik Geurts en zien kammeruj zeker nie. De urste pries bej de groepe ging naor de Prinsedragers: kammeruj van Prins Rob en Prinses Linda. Bej de duo's wonne Pieter en Iene Thiele, die daorvur wel dun hiele aovund strak ware blieve stoan.

Bej de ienlinge was dur genne winnaar. Den pries het Vorst Erik zelluf dur ziene nek gedouwd.

Nao afloep is de raod eier wist te eate bej Roel en Monique. Op verzuuk van Roel mos ik uutdrukkeluk vermelde: Wie nie geluft dat Roel hiel lekker eier kan bakke, is kommende nacht van harte uutgeneudigd um ze zelluf bej um te komme pruuve.

Vrejdag 2 fibbrewari zien we naor Circus Mok gewist. Op zich enne moje aovund. Mar chauvinistisch as we zien, vonde wej natuurluk osse eige bonte aovund beater.

Zaoterdag 3 fibbrewari hebbe we wer dun krant verkocht.

Wiste gej dat:

- daor wer hiel vur werruk ien zaat
- dur mier krante verkocht zien as vurrig jaor
- Prinses Linda hielemaol gen traktor kan reje
- Prins Rob veul agressiever is as dat hej op dun vurkant dur uut ziet
- Dur enkele neje rubrieke ien de krant stonde
- Dur ok WC-krakers ien stonte
- Liset Sanders net duut of zej 'wiste gej dat' geschreve het
- Dur vur ut urst sinds jaore en foto ien stut van de complete raod
- Dun puzzel zo moeiluk was, dat allien Mark Kleeve um op kos losse
- Dun krant wer gewoen hielemaol top was!

Un dag latter was wer de prinsereceptie. Altied wer ien van de mojste daage ut prinsepaar en ut jeugdtrio. Dit jaor hiel errug speciaal, umdat ge duudeluk kost zien dat Prins Rob en Prinses Linda an ut oefene ware vur dun volgende mojste dag van hun leave.

Ut was druk, ut was gezellig, dun umzet was goed. We hebbe nao afloep van de receptie dur nog en moj feesje van gemakt. Zellufs de joekskapel zej nao afloep dat zej ut un prachtig fiest han gevonde.

Ien dun Terp was ut 's aovus nie mer zo druk, mar dat kriegde bejna vanzelluf as iederien ien de Linda zich al hielmaol kapot rent ien de polonaise.

Prins Rob, Prinses Linda, Jeugdprins Giel, Jeugdvorst Niek, Jeugdmar Maarten en wej allemaol kunne wer terugkieke op un hiel geslaagde dag.

We zien ok nog mit en antal bej de Pielreuze gewist enwel op zaoterdag 10 fibbrewari. Hier was nameluk Jeanne voermans, dochter van Thej, prinses geworre. Umdat we nie naor de receptie kosse, ginge we mar naor ut verkledbal. Ijsselsteyn haj geluk dat wej dur ware, want de urste polonaise wier dur os iengezet en vervolgus goeje iederien alles dur uut. Allien Maria van Vorst Erik haj nog wat aover en die het dat mar ien dun Taxi naor huus dur uut gegoeid.

En dan is ut alwer donderdag 15 fibbrewari, vlak vur dun officiële carnaval. Tradisiegetrouw ware we wer uutgeneudigd bej de SJMO. Gezellig um efkus an te gaon en vast ien de stemming te komme.

Vrejdagmiddag volgt dan urst de kienderoptocht en ginge we mit alle kiender van Oeldere ien enne lange optocht ut Jeugdtrio ophale bej Vorst Maarten. Dur was enne moje prinsewage gemakt dur team frenske en zoe ginge we allemaol naor de linde, naor ut scholcarnavalsbal. Aover de toekomst hoeve we os gen zurreg te make, want hier wier al flink carnaval gevierd

's Aovus was ut ziekebezuuk gepland. Paula van d'n Terp haj ut flink op dur heupe gekrege en daorvur ien ut ziekehuus terecht gekomme. Paula was blie mit ut bezuuk en Prins Rob het ur plechtig beloofd dat zej zich gen zurrege hoefde te make aover dun umzet en dat hej nou Gerrit wel naor bed zij brenge as hej achter dun tap ien slaop viel.

Zaoterdagmerrege 17 fibbrewari is dur urst en bezuuk gebrocht bej ut klenst mokske. Dit jaor thies ?. Ok hier zaagde gewoen Prins Rob en Prinses Linda wer oefene. Nea, nea, verborgen verlangens halde gewoen mit carnaval nie verborge.

's Middags naor de gemeant. Dit jaor nog vroeger as anders. Ut was moj op de gemeant. Opperburger Waals, Prins van Rooj, Vorst Milton van Rooj en vural Vorst Rob uut de smakt names de kerkdurrepe han goeje verhale.

Hiernao koste naor ut schouwburgplein vur de vastelaovusroets. Wej as de spurriemok hebbe echter beslote um hier nie an mit te gaon doen. Wej stoan vur os eige durrep en nie vur rooj. Wej zulle echt nie Oelderse minse gaon stimuliere um naor Rooj te gaon as wej zelluf nog programma hebbe ien Oeldere. Nie umdat wej wat tiggige Rooj hebbe, mar gewoen umdat wej dur vur Oeldere zien, dun Oelderse carnaval ien iere wille halde en daormit bej wille drage an de leafbaarheid van os durrep.

Um 19.00 uur was wer de heilige mis. Dit jaor wer goed bezocht. Verrassend ien dees mis was mit name de muziek van What Ever. Zej han dur zang bej en dat klonk os, ien os oere tenminste, werkeluk as muziek ien de oere. Geweldig moj gedoan.

Traditioneel duj de Vorst wer ut slotwoord. Dit jaor vroeg Erik zich af of we os nie wat dukker zoe kosse gedrage as mit carnaval. Gao is dukker achter elkaar staon en mit de neus dezelfde kant op. Dan kumt en blijft ok alles ien Oeldere hielemoal goed.

Tot slot vroeg hej nog en applaus vur osse pastoer, den alwer 20 jaor ien Oeldere wont en werrekt.

Nao de mis ginge we vur dun 19<sup>de</sup> kier bej pastoer op de koffie.

Ien de pastorie kreeg pastoer vervolgus wer en moj carnivalsonderscheiding um ien zien kast te hange en nou is ziene kast wer vol. Dus het de technische commissie dur wer en opdracht bej vur volgend jaor.

Nao ut korte bezuuk an de pastorie volgde ut Mokkebal ien de linde.

Ut begos mit chi-chi-wa, en vervolgus hebbe we zon bitje dun hiele carnaval dur gechi-chi-wad. De opening wier vervolgd mit osse eige roetsj en Prins Rob den Roetsjde wat af.

Vervolgus mooge Wout en Lilian nog enne kier roetsje, umdat dit hunne leaste carnaval zij werre ien raodsleje pak. En toen kos ut fiest beginne. En fiest wier ut. Goeje muziek van de band, de raod die de zaal goed anzwengelde en alle anwezige die dur geweldig veul zin ien han. Af en toe en bitje lomp, mar net nie te.

Nao afloep, dit kier wel eier, mar gen gebakke. Nej gekokte eier. Sommige vonde ut un succes, andere wer nie. Ien ieder geval schilde ut daags durnao mit opruume wel echt veul.

Zondag rond de middag wier, same mit de mok is los, urst Jeugdprins Giel afgehald an de Mielderseweg en vervolgus ginge we naor dun andere kant van Oeldere um Prins Rob en Prinses Linda af te hale. Bej beide huus wier enne polonaise geloepe en vervolgus wiere ze snel op dun wage gesmete um naor dun terp te gaon.

Hier was wer dun brunch vur de raod, de jeugdraod, de mok is los en dun anhang. Dun brunch was goed verzurgd. Dur wiere nog efkus wat medailles uutgereikt en toen mosse we alwer naor de Linde.

Ut kienderbal was gezellig en goed bezocht. Op zondag zaat dezelfde band as die van zaoterdagaovund dur wer. De spurriemokske han goed hun best gedaon op de kleurplate en de pries wiere dan ok wer uutgereikt. Ut kienderbal was moj bezocht en errug gezellig.

's Aovus ien dun terp was ut moj vol en kej gezellig. Dur wier flink gehost en gespronge en de sfeer was goed. Ut biljart wier is enne kier anders gebruikt as normaal. De balle schove dur aover hin, ien plats van rolle.

Ut was wat lomper as zoaterdagavond, mar iederien haj zich super geamusiert.

Carnavalsmaondag beginne we mit ut snotneuzebal. Ut was moj schon ien de zaal. De vloer was vur de klenste en ok die kosse onder leiding van Prinses Linda al behuurluk goed chi-chi-wa-e.

's middags hebbe we urst mitgetrokke mit de roojse optocht. Mit osse wage en os enthousiasme kwame we goed vur dun dag. We hebbe os zelluf mar wer gewoen dun urste pries gegeave van oelderse prinsewages ien Rooj en iederien wer blie.

Daornao snel terug naor Oeldere vur os eige kienderbal. Dit jaor mit enne andere DJ. Zien naam was Andre bon appart. En appart was hej. Iederien vond ut moj, grappig en gezellig. Wer gewoen enne geslaagde middag.

's Aovus ien dun terp ging iederien vort echt flink te kier. Ut biljart wis nie wat um ovverkwaam. Iederien schoof dur ooverhin. Allien os eige Prins Rob wis nie of hej dur aoverhin wo of dur underdur. Tot slot besloot hej mar um dur durhin te gaon, mar dat bleek toch echt te veul van ut goeje. Zien lippe bloeje harder dan die van Linda oeit gedaon han. (volgus Rob dan).

#### Carnavalsdinsdag

Ut begos an ut begin van de middag mit dun optocht. Andere jaore duj de helft van Oeldere mit en de helft stond te kieke. Dit jaor echter, duj  $\frac{3}{4}$  mit en  $\frac{1}{4}$  stond te kieke, mar dan wel 3 kier. Dur ware mar liefst 21 categorie-en en ien alle categorie-en wier allien dun urste pries beloond. Anders zuj ut toch echt te veul van ut goeje werre. Al mit al begint dun optocht vort echt urges op te lieke. Mit dank an un antal fanatieke jongere die vort moje wages make. Nao dun optocht volgde enne drukke middag ien de liende. Wederom haj de boerebrullufstcie zien uuterste best gedaon en wat mojs op de planke gezet. De familie wier vurgesteld en an de hand van en fotopresentatie wier de zaal an het lache gemakt. En foto van boerekoel en daornao en foto van boerkoel mit Rob Steeghs onder de noemer boerekoel mit worst. Vervolgus wiere Johan en Trudy Verdeuzeldonk ien ut onecht getrouwd mit daornao en drukke receptie. DJ Andre bon appart stond ok wer te popele um te beginne en hej mier dur wer en dolle boel van vur jong en ald.

We slote wer af mit boeremoes, wat dur bej iederien goed ien ging.

Um tien uur kwaam dur en end an de jeugdcarneval. De mok wier angestokt. Ut jeugdtrio en de jeugdraod han un moje carnaval gehad en de traone bleve dan ok nie binne. De jeugdbals ware gezellig en de jeugd het zich goed uut kunne leave.

3 daag soos in 3 woorde: druk, het, gezellig.

Hiermit is alles beschreve. Ut was wer gewoen goed, we beginne dur an te wenne. Mar wej blieve ut prettig viende dat de soos dit duut. Dus bej dizze wille wej de jeugdcie bedanke vur alles wat zej vur de jeugd, mar ok vur de carnavalsvereniging doen.

Ien dun terp was ut gezellig en erg druk. Dur wier nog flink gehost, gespronge, gedronke en ge-chi-chi-waad. Dit was al dun derde avond dat dur enne hiele goeje DJ stond en dat makt mit zon fiest toch wel veul uut.

Om 23.45 uur kwaam dur toch un moment van afsluuting. Urst wiere Thej Peeters en Math Drabbels bedankt, die stopte bej de mok is los. Beide ex-prinse, beide mede-oprichters van de

Kelderband en latter van de mok is los. Beide kels die wej mit de carnaval nog nie zun wille misse en wej neme an dat zej daor ok wel vur zurrege dat wej hun nie zulle misse.

Vervolgus wier Frank Pluum naor veure gehald. Nao 3 jaor bej de raad te zien gewist, besloot hej dur mit te stoppe. Frank het zich dur goed bej thuis gevuild en het altied goed op de jeugd gelet.

Vervolgus was ut de beurt an Wout en Lilian. Ut duut altied pien binne en vereniging as ge van zo'n minse afscheid mot neme. Prins, Vorst, vurzitter, doet um dat ma nao. Hij wier same mit zien Lilian efkus ien ut zonneke gezet en bedankt.

Tot slot was ut leaste woord an Prins Rob en Prinses Linda. Vorst Erik probierde nog iene kier um Rob te laote kniele en Linda mit traone ien dur oege 'jao' te laote zegge, mar ut moog nie zoe zien.

Vervolgus ging iederien naor buute um de mok an te stoke.

Krejemars, Oeldere mien durrepe, Spurriemokke oeldere alaaf en terug naor binne um rustig nao te praote en nao te fieste.

Woensdag opruume, ontduchtere, eate bej Rob en Linda, nikse, 19.00 uur naor de kerk en vervolgus nog herring schelle ien den Terp. Ok dit is goed verzurgd en gezellig um wat nao te kletse.

Seizoen 2006-2007 was un moj seizoen, nog nie gans af vur os Prinsepaar, mar wel ut grutste diel. Wej hope dat ut net zo moj aflupt as dat ut tot nog toe gewist is. Zej kriege op 11-11 nog de opening van os jubileumseizoen mit en CD-presentatie en daornao nog ut Vorsteraodsbal um dan echt af te gaon treje.

Bej dizze wille wj alle Spurriemokke en spurriemokkinne, en ien ut bejzonder natuurluk Prins Rob en Prinses Linda bedanke vur ut moje seizoen tot nog toe.